

Svilup territorial dal stadi franzos

In cudesch nov descriva la Frantscha

DA GUIU SOBIELA-CAANITZ

■ **Ina nova monografia davart in pajais è gist cumparida en Germania*. L'autur è Jürgen Schmude, anteriur docent da geografia economica a la Ludwig-Maximilians-Universität da Minca.** El descriva ina nazium aliada e limitrofa da la Germania ed in dals stadis ils pli vegls da l'Europa: La Frantscha. Lezza è limitrofa e relevanta era per la Svizra, anzi, sia lingua è ina da las quatter da la confederaziun. I vala la paina da s'interessar per quella publicaziun nova.

Dapi retg Hugo Capet († 996)

L'emprim chapitel ha num: «Zur Territorientwicklung des französischen Staates». Gea, quel stadi devi gia cur ch'i na deva ni in stadi tudestg ni in svizzer. Schmude scriva: «Il stadi territorial franzos ha cumenzà a sa furmar cun la fin da l'Imperi francon dal vest e la surpigliada da la pussanza tras ils Capetings l'onn 987 (...). Ils successurs da retg Hugo han consolidà lur domena enturn Paris ed Orléans durant pliras generaziuns (...). Las guerras u cruschadas cunter ils Albigens (1209–1229) han sfratgà lur moviment; lur aderents han ins quasi tuts extirpà. Davent da 1229 è ina gronda part dal Languedoc vegnida franzosa» (p. 9). L'autur menziuna Burgogna e Provenza (p. 9) sco duas annexiuns considerablas dal

15avel tschientaner; la tabella daspèra e la cartina da p. 10 numnan anc l'Anjou per lezza perioda. Lur «en la segunda mesadad dal 16avel ed il 17avel han guerras religiusas (...) e revoltas da la noblezza (...) puspè smanatschà la monarchia. Lezza è sa fatga valair, betg il davos cun las metodas brutalas dal minister cardinal Richelieu [1585–1642]. Ins ha sfratgà la resistenza dal protestantissem e suttamess l'aristocrazia (...). L'unitad 'naziunala' e l'autorità roiala han cuntanschì lur zenit en l'absolutissem da retg Louis XIV [1638–1715] (...). La revoluziun da 1789 ha creà 83 districts ['départements'] (...). Lezzas structuradas administrativas existan per gronda part anc adina, schebain ch'i dat oz 101 districts» (pp. 9–10), numnadamain 96 en Europa («France métropolitaine», passa 65 milliuns olmas) e tschintg en l'ultramar («départements d'outre-mer» [DOM], passa dus milliuns olmas). Otg chantuns svizzers (BL, BS, GE, JU, NE, SO, VD e VS) èn limitrofs da tschintg «départements»: Ain (F-01), Doubs (F-25), Haute-Savoie (F-74), Haut-Rhin (F-68) et Territoire de Belfort (F-90).

L'iarta da l'imperi colonial

Tranter 1830 e 1939 ha la Frantscha conquistà in vast imperi colonial ordaifer l'Europa. Schmude: «Sunter la Segunda Guerra

mundiala ha lez entschavì a scruddar (...). Cuzunt suenter 1958 ha la Frantscha relaschà bleras colonias» (p. 11). Anteriurs possess franzos en Africa han mantegnì lur lingua sco uffiziala. Ils 15 da favrer 2017 ha president Emmanuel Macron definì la colonisaziun «un crime contre l'humanité». Ma la Frantscha cumpiglia anc adina in'iarta territoriala da ses anteriur imperi exotic. Schmude numna las differentas parts da la «France d'outre-mer» oz. Ils DOM èn la Guadeloupe e Martinique en las Antillas, La Réunion e Mayotte «en l'Ocean Indic» e la Guyane «sin il continent sid-american» (p. 17). Tschels in tschess franzos d'ultramar han statuts differents. Saint-Martin e Saint-Barthélemy èn inslas caribicas; la part meridiunala da l'emprima, uffizialmain per olandais Sint Maarten, fa dentant part dals Pajais Bass. «Las inslas Saint-Pierre e Miquelon èn situadas sper la costa orientala dal Canada, sper Terranova (...). Wallis e Futuna, sco era la Polinesia franzosa èn inslas amez il Pacific dal sid (...). La Nova Caledonia, [er] en il Pacific dal sid, duai puspè vuschar anc 2019 davart sia independenza» (p. 12). L'emprim referendum 2018 muntava il mantegniment da lezza «Collectivité sui generis».

* Jürgen Schmude, Frankreich. Darmstadt (wbg, ISBN 978-3-534-25201-5) 2019.